

## DA SEA

Du reflects da lift high up abün  
In aa his different lays,  
An glances idda bright light  
Wi da boanie sunny days.  
Du nüns da dunter dukes ta sleep  
An du swittles ower da saand,  
Playin 'canna catch me' wi da wind  
Whin he skjips doon ower da laand.

Bit sood da wind be coarse wi dee,  
An da lift be grey an tirn,  
Du can bare dee teeth laek a bitin dug,  
An frush an spit an girn.  
Du can tear da face atto da banks  
Whin du's kerried awa wi dee game,  
Dan njoag an gronn laek a dortin bairn  
Lang efter da wind's geen hame.

Du lays monny a boanie boat in bruck  
An monny a hert in twa;  
Kerries monny a freend an monny a foe,  
Baith tae wis an awa.  
Mirrors da mün in romantic mood  
For da lad an lass gjaan hame,  
Or saftly achoes da aald man's sighs  
As he waatches dee in a draem.

Haand athin haand wi da wind gengs du,  
An nedder keens night or day;  
Makkin or brakkin da wark a man,  
An meden oot whaat he can hae.  
Du's beauty an freedom an life an death,  
An we sood aa staand a-daar a dee,  
Fro nae man can tame dee an nae hadds keep,  
Bit du's inspiration ta me.

For whin wi a coarse an ackwirt ert  
I staand doon near ta da shore,  
An watch dee froadin at me feet  
An listen ta dee roar,  
As du wirries da muckle rocks an kletts  
At du fins atti dee rod  
Du lights a fire atti me hert,  
An I git closs ta God.